



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka (“Službeni glasnik BiH” broj 95/12), člana 25. Pravilnika o godišnjim finansijskim izvještajima političkih stranaka (“Službeni glasnik BiH” broj 96/13), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka (“Službeni glasnik BiH”, broj: 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2012. GODINU I POSTIZBORNOG FINANSIJSKOG IZVJEŠTAJA – LOKALNI IZBORI 2012. **STRANKE DEMOKRATSKE AKCIJE**

Broj: 03-07-6- 659/13  
Sarajevo, 11. jul 2014. godine

## *SADRŽAJ*

MIŠLJENJE REVIZORA.....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije.....	5
Cilj revizije.....	5
Obim revizije.....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE.....	10

## **MIŠLJENJE REVIZORA**

Služba za reviziju finansiranja političkih stranaka (u daljem tekstu: Služba za reviziju) je izvršila reviziju finansijskih izvještaja Stranke demokratske akcije za 2012. godinu i to: godišnjeg finansijskog izvještaja za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i odredbama člana 15.10 Izbornog zakona BiH, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom smo utvrdili da Stranka demokratske akcije u izvještajnom periodu nije postupila u skladu sa odredbama člana 8. stav (1), člana 11. stav (1) i (3) Zakona o finansiranju političkih stranaka, koji je bio na snazi do 04.12.2012. godine, te odredbama člana 8. stav (1) Zakona o finansiranju političkih stranaka, koji je na snazi od 05.12.2012. godine.**

**Prema našem mišljenju, osim navedenog, revidirani finansijski izvještaj ukazuje da je Stranka demokratske akcije u 2012. godini postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Stranke demokratske akcije za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2012. godinu Stranka demokratske akcije je iskazala prihod u iznosu od 4.458.719,77 KM, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	71.082,89	1,59%
2	Prilozi fizičkih lica	741.530,08	16,63%
3	Prilozi pravnih lica	150.930,00	3,39%
4	Prihodi od imovine	26.700,00	0,60%
5	Prihodi od pr.lica	0,00	0,00%
6	Prihodi od poklona	1.600,00	0,04%
7	Prihodi iz budžeta	3.337.711,30	74,86%
8	Ostali prihodi	129.165,50	2,90%
	<b>Ukupni prihodi:</b>	<b>4.458.719,77</b>	<b>100,00%</b>

Prema podacima iz godišnjeg finansijskog izvještaja, Stranka demokratske akcije je ostvarila rashode u iznosu od 5.114.568,85 KM.

## 2. PREDSTAVLJANJE POLITIČKE STRANKE

Naziv političke stranke: Stranka demokratske akcije. Skraćeni naziv stranke je SDA.

Stranka demokratske akcije je upisana Rješenjem Višeg suda u Sarajevu broj: R-I-7/90 od 13.06.1990. godine u registar Udruženja.

Sjedište političke stranke je u Sarajevu, ulica Mehmeda Spahe 14.

Za zastupanje stranke ovlašten je Sulejman Tihić, predsjednik stranke.

Lice ovlašteno za podnošenje finansijskih izvještaja za 2012. godinu je Amir Zukić.

Prema podacima iz godišnjeg finansijskog izvještaja za 2012. godinu, organizacionu strukturu Stranke demokratske akcije čine:

- Centrala SDA,
- 9 kantonalnih odbora,
- 5 regionalnih odbora,
- SDA Brčko Distrikt BiH,
- SDA Gradski odbor Mostar, i
- 117 općinskih odbora.

### 3. OPIS REVIZIJE

**Predmet revizije** je godišnji finansijski izvještaj Stranke demokratske akcije za 2012. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine i to sljedećih organizacionih dijelova političke stranke:

- Centrale Stranke demokratske akcije Sarajevo,
- Kantonalnog odbora Stranke demokratske akcije Sarajevo i
- Općinskog odbora Stranke demokratske akcije Bihać.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Stranka demokratske akcije u izvještajnom periodu postupala u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i članom 15.10 Izbornog zakona BiH.

**Obim revizije** finansijskih izvještaja Stranke demokratske akcije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta i troškove izborne kampanje.

### 4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Stranke demokratske akcije u periodu od 2004. do 2011. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2011. godinu, Služba za reviziju je izdala Izvještaj o pregledu godišnjeg finansijskog izvještaja Stranke demokratske akcije sa mišljenjem revizora, nalazima revizije i preporukama stranci da se ne finansira zabranjenim priložima, da uspostavi potpune evidencije o svojim prihodima i rashodima i da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2012. godinu, utvrđeno je da Stranka demokratske akcije nije ispoštovala ranije date preporuke revizije.

### 5. NALAZI I PREPORUKE

#### 5.1. NALAZI

- a) **Stranka demokratske akcije je postupila suprotno odredbama člana 8. stav (1) Zakona o finansiranju političkih stranaka, koji je bio na snazi do 04.12.2012. godine<sup>1</sup> i člana 8. stav (1) Zakona o finansiranju političkih stranaka, koji je na snazi od 05.12.2012. godine.**

- (1) Revizijom je utvrđeno da je stranka u finansijskom izvještaju u okviru Ostalih prihoda iskazala naknadno utvrđene prihode proteklih godina za Općinski odbor SDA Cazin u iznosu od 100,00 KM.

---

<sup>1</sup> U skladu sa odredbom iz člana 8. stav (1) tada tada važećeg Zakona o finansiranju, državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

Uvidom u dokumentaciju OO SDA Cazin utvrđeno je da je stranka izvršila otpis obaveza po računu za mobilni telefon za osmi mjesec 2010. godine prema javnom preduzeću „BH Telekom“<sup>2</sup>, u iznosu od 100,00 KM, čime je postupila suprotno odredbama člana 8. stav (1) Zakona o finansiranju političkih stranaka, koji je na snazi od 05.12.2012. godine.

- (2) Revizijom je utvrđeno da su odbori Stranke demokratske akcije koristili poslovne prostorije u vlasništvu općina bez naknade ili po povoljnijim uslovima, čime su prekršili odredbe člana 8. stav (1) Zakona o finansiranju političkih stranaka, koji je bio na snazi do 04.12.2012. godine.
- Prema podacima koje je dostavila Općina Sanski Most<sup>3</sup>, utvrđeno je da je Općinski odbor SDA Sanski Most u 2012. godini koristio bez naknade prostor koji je u vlasništvu ove općine. Obzirom da prema Odluci o uslovima i načinu davanja u zakup poslovnih zgrada i poslovnih prostorija na području Općine Sanski Most cijena zakupa za poslovne prostorije površine preko 60 m<sup>2</sup> iznosi 8,00 KM/m<sup>2</sup>, stranka je korištenjem prostora površine 61,34 m<sup>2</sup>, ostvarila zabranjeni prilog za 2012. godinu u iznosu od 5.397,92 KM.
  - Opštinski odbor SDA Teslić je na osnovu Ugovora o zakupu poslovnih prostorija sa Opštinom Teslić, broj: 02-014-434/09 od 15.07.2019. godine, koristio poslovni prostor površine 14 m<sup>2</sup> po cijeni od 0,50 KM/m<sup>2</sup> što na mjesečnom nivou iznosi 7,00 KM. Korištenjem poslovnog prostora u periodu od 11 mjeseci, po cijeni zakupnine ispod tržišne cijene, stranka je ostvarila prilog Opštine Teslić u iznosu od 77,00 KM.
  - Prema podacima koje je dostavila Općina Ilijaš<sup>4</sup>, utvrđeno je da je Općinski odbor SDA Ilijaš u 2012. godini koristio bez naknade prostor površine 37,96 m<sup>2</sup>, koji je u vlasništvu ove općine. Obzirom da prema Odluci o načinu i visini plaćanja zakupnine poslovnih prostora na području Općine Ilijaš („Službene novine Kantona Sarajevo“ broj 2/00), cijena zakupa iznosi 8,00 KM/m<sup>2</sup>, stranka je korištenjem prostora ostvarila zabranjeni prilog za 2012. godinu u iznosu od 3.340,48 KM.
  - Općinski odbor SDA Ilidža je na osnovu ugovora o zakupu poslovnog prostora broj: 05-23-818/2-08, koristio poslovni prostor površine 63 m<sup>2</sup> uz obavezu plaćanja zakupnine u iznosu od 10% od početne cijene zakupa, koja iznosi 20,00 KM/m<sup>2</sup> za extra zonu, u kojoj se nalazi navedeni poslovni prostor. Korištenjem poslovnog prostora u periodu od 01.01.-30.11.2012. godine, po cijeni od 2,00 KM/m<sup>2</sup> mjesečno, Stranka demokratske akcije je ostvarila zabranjen prilog od Općine Ilidža u iznosu od 12.474,00 KM bez PDV-a.
  - Općinski odbor SDA Centar Sarajevo je na osnovu ugovora o zakupu poslovnih prostorija broj: 04-49-21-31/09, zaključen dana 31.03.2008. godine sa Općinom Centar Sarajevo, koristio poslovni prostor površine 105 m<sup>2</sup>, po cijeni mjesečne zakupnine od 1,00 KM/m<sup>2</sup>. Odlukom o dodjeli u zakup poslovnih zgrada i prostorija Općine Centar Sarajevo broj: 01-49-1690/09 od 23.06.2009. godine („Službene novine Kantona Sarajevo“, broj 20/09), utvrđen je najniži iznos zakupnine u I zoni Općine Centar u iznosu od 20,00 KM/m<sup>2</sup>. Korištenjem poslovnog prostora do novembra 2012. godine, po nižoj cijeni od cijene utvrđene navedenom odlukom, OO SDA Cetar Sarajevo je ostvarila zabranjen prilog od Općine Centar Sarajevo u iznosu od 21.945,00 KM bez PDV-a.
  - Prema podacima koje je dostavila Općina Novo Sarajevo, utvrđeno je da je Općinski odbor SDA Novo Sarajevo u 2012. godini koristio bez naknade prostor koji je u vlasništvu ove općine. Obzirom da prema Odluci o načinu i visini plaćanja zakupnine poslovnih prostora na području Općine Novo Sarajevo („Službene novine Kantona Sarajevo“ broj 29/07) cijena zakupa za udruženja iznosi 5,00 KM/m<sup>2</sup>, stranka je korištenjem prostora površine 37,96 m<sup>2</sup> ostvarila zabranjeni prilog u iznosu od 2.087,80 KM bez PDV-a.

<sup>2</sup> Račun u iznosu od 251,35 KM, koji je stranka platila u iznosu od 151,35 KM.

<sup>3</sup> Akt Općine Sanski Most broj 03-23-8-830/13 od 24.04.2013. godine.

<sup>4</sup> Akt Općine Ilijaš broj 04/1-14-857/13 od 03.05.2013. godine.

- Prema podacima koje je dostavila Općina Jablanica<sup>5</sup>, utvrđeno je da je Općinski odbor SDA Jablanica u 2012. godini koristio bez naknade prostor koji je u vlasništvu ove općine. Obzirom da prema Odluci o prodaji i davanju u zakup poslovnih prostorija na području Općine Jablanica cijena zakupa za poslovne prostorije iznosi 8,00 KM/m<sup>2</sup>, stranka je korištenjem prostora površine 24 m<sup>2</sup>, ostvarila zabranjeni prilog u iznosu od 2.112,00 KM.
- Općinski odbor SDA Srebrenica je na Osnovu odluke Načelnika Opštine Srebrenica od 03.10.2005. godine, koristio bez naknade prostorije u zgradi stare Policijske stanice u Srebrenici.
- Prema podacima koje je dostavila Općina Bosanska Krupa<sup>6</sup>, utvrđeno je da je Općinski odbor SDA Bosanska Krupa u 2012. godini koristio bez naknade prostor koji je u vlasništvu ove općine.
- Prema podacima koje je dostavila Općina Fojnica<sup>7</sup>, utvrđeno je da je Općinski odbor SDA Fojnica u 2012. godini koristio bez naknade prostor koji je u vlasništvu ove općine.

**b) Politička stranka je prekršila odredbe člana 11. stav (1) i stav (3) Zakona o finansiranju političkih stranaka koji je bio na snazi do 04.12.2012. godine.**

Revizijom je utvrđeno da je Stranka demokratske akcije u svojim poslovnim knjigama evidentirala prihode u većem iznosu od ostvarenih a rashode i obaveze u manjem iznosu, i da obrasce godišnjeg finansijskog izvještaja nije popunila u skladu sa Pravilnikom o godišnjim finansijskim izvještajima političkih stranaka („Službeni glasnik BiH” broj 61/06)- u daljem tekstu: Pravilnik, čime su prekršene odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.

- (1) Stranka je u finansijskom izvještaju iskazala ostale prihode u iznosu od 129.165,50 KM. Revizijom je utvrđeno da stranka nije pravilno iskazala ostale prihode, odnosno da dio iskazanih ostalih prihoda ne predstavlja prihod stranke, te je stranka pogrešnim iskazivanjem uvećala prihode za 13.200,22 KM, i time prekršila odredbe člana 13. stav (1) Pravilnika.
- Revizijom je utvrđeno da je stranka za Kantonalni odbor Stranke demokratske akcije Sarajevo iskazala u godišnjem finansijskom izvještaju prihod od prodaje vozila u iznosu od 11.000,00 KM.  
Uvidom u dokumentaciju utvrđeno je da je prodato vozilo na dan prodaje imalo vrijednost u iznosu od 8.730,78 KM, te da je prodajom istog za 11.000,00 KM stranka ostvarila dobitak po osnovu prodaje u iznosu od 2.269,22 KM.  
Pogrešnim iskazivanjem stranka je neosnovano uvećala prihode i rashode stranke za 8.730,78 KM, čime je prekršila odredbe člana 13. stav (1) i člana 20. Pravilnika.
  - Stranka je za Općinski odbor Stranke demokratske akcije Fojnica iskazala prihod od prodaje vozila u iznosu od 2.020,00 KM. Uvidom u dokumentaciju utvrđeno je da stranka navedeno sredstvo nije imala uknjiženo u svojim poslovnim knjigama, te ne raspolaže adekvatnom evidencijom, kojom bi mogla utvrditi da li cjelokupan iznos predstavlja prihod stranke.
  - Stranka je za Općinski odbor Stranke demokratske akcije Breza iskazala Ostale prihode u iznosu od 265,47 KM. Uvidom u izvode utvrđeno je da je Stranka penzionera-umirovljenika BiH u toku 2012. godine uplaćivala sredstva u ukupnom iznosu od 265,47 KM, na ime refundacije za plaćene troškove električne energije, koje je platio Općinski odbor SDA Breza. Obzirom da je Stranka penzionera-umirovljenika BiH izvršila refundaciju sredstva koje je za nju uplatio OO SDA Breza, navedeni iznos sredstava ne predstavlja prihod stranke.

<sup>5</sup> Akt Općine Jablanica broj 01-07-827-13 od 06.05.2013. godine.

<sup>6</sup> Akt Općine Bosanska Krupa broj 08-14-2063-1/13 od 24.04.2013. godine.

<sup>7</sup> Akt Općine Fojnica broj 03-31-510/13 od 29.04.2013. godine

- Stranka je za Regionalni odbor SDA Bosanska Krajina iskazala Ostale prihode u iznosu od 2.183,61 KM. Na osnovu raspoložive dokumentacije utvrđeno je da je Balkan Investment Banka stranci uplatila sredstva u iznosu od 2.183,61 KM, po zahtjevu stranke na ime zadnje rate pozajmljenih sredstava. Stranka u svojim poslovnim knjigama nema evidentirana potraživanja od navedene banke po osnovu datih pozajmica.  
Obzirom da se radi o povratu pozajmljenih sredstava, stranka je ova sredstva trebala evidentirati na kontu potraživanja, a ne na kontu prihoda stranke.
- (2) U obrascu 3-a (Prilozi fizičkih lica) stranka je iskazala prilog fizičkog lica u okviru priloga nižih od 100 KM. Uvidom u izvode utvrđeno je da je navedeno lice dalo prilog stranci u iznosu od 140,00 KM, što je stranka imala za obavezu iskazati kao prilog veći od 100 KM. Nepravilnim iskazivanjem priloga stranka je postupila suprotno odredbama člana 14. Pravilnika.
- (3) Stranka je u obrascu 4 (Ukupni troškovi) i 4-1 (Režijsko-administrativni i ostali troškovi) finansijskog izvještaja iskazala troškove u manjem iznosu za 14.520,00 KM, što ukazuje na činjenicu da stranka u trenutku plaćanja evidentira troškove. Neiskazivanjem troškova stranka je prekršila odredbe člana 20. i člana 21. Pravilnika.
- Stranka je iskazala troškove zakupa za Centralu Stranke demokratske akcije Sarajevo u iznosu od 7.200,00 KM.  
Prema evidenciji Službe za zajedničke poslove organa i tijela Federacije Bosne i Hercegovine<sup>8</sup> troškovi zakupa u 2012. godini iznose 18.000,00 KM.  
Stranka je za Centralu iskazala troškove zakupa u manjem iznosu za 10.800,00 KM.
- Stranka je iskazala troškove zakupa za Općinski odbor Stranke demokratske akcije Sapna u iznosu od 1.650,00 KM, odnosno manje troškove za 150,00 KM.  
Prema Ugovoru o zakupu sa fizičkim licem cijena mjesečnog zakupa je 150,00 KM, što za 12 mjeseci iznosi 1.800,00 KM.
- Stranka je iskazala troškove zakupa za poslovni prostor koji je koristio Općinski odbor Stranke demokratske akcije Donji Vakuf u iznosu od 990,00 KM. Prema Ugovoru o zakupu sa Općinom Donji Vakuf cijena mjesečnog zakupa je 330,00 KM, što za 12 mjeseci iznosi 3.960,00 KM bez PDV-a.  
Stranka je za ovaj odbor iskazala troškove zakupa u manjem iznosu za 2.970,00 KM.
- Stranka je iskazala troškove zakupa za Općinski odbor Stranke demokratske akcije Janja u manjem iznosu za 600,00 KM u odnosu na ugovorenu cijenu zakupa.  
Prema Ugovoru o zakupu sa fizičkim licem cijena mjesečnog zakupa je 200,00 KM, odnosno 2.400,00 KM za 2012. godinu dok je stranka u godišnjem finansijskom izvještaju iskazala troškove u iznosu od 1.800,00 KM.
- Pored navedenog revizijom je utvrđeno da je Općinski odbor SDA Bratunac iskazao troškove zakupa u većem iznosu od ostvarenog za 600,00 KM.
- (4) U obrascu 5 (pozajmice, krediti i dugovanja) finansijskog izvještaja stranka je iskazala obaveze prema dobavljačima u iznosu od 1.220.501,49 KM.  
Revizijom, a na osnovu Izvoda otvorenih stavki, utvrđeno je da Stranka demokratske akcije nije u poslovnim knjigama uspostavila potpune i tačne evidencije o obavezama prema dobavljačima i nije iskazala svoje obaveze ispravno u godišnjem finansijskom izvještaju, čime je prekršila odredbe člana 23. Pravilnika.
- Centrala Stranke demokratske akcije Sarajevo je u finansijskom izvještaju i poslovnim knjigama iskazala obaveze po osnovu zakupa prema Službi za zajedničke poslove organa i tijela Federacije Bosne i Hercegovine u iznosu od 52.200,00 KM.

<sup>8</sup> Izvod otvorenih stavki Službe za zajedničke poslove organa i tijela Federacije Bosne i Hercegovine do 31.12.2012. godine.



Na osnovu podataka koje je dostavila Služba za zajedničke poslove organa i tijela Federacije Bosne i Hercegovine, utvrđeno je da su obaveze SDA na dan 31.12.2012. godine iznosile 115.480,00 KM. Prema izjavi stranke koja je dostavljena uz odgovor na Preliminarni izvještaj o reviziji, sudski postupak sa navedenim dobavljačem je u toku.

- Revizijom je utvrđeno da je Centrala SDA Sarajevo u obrascu 5 godišnjeg finansijskog izvještaja i poslovnim knjigama iskazala manje obaveze prema pravnom licu "ASA PVA" Sarajevo za 5.585,66 KM.  
Uvidom u finansijsku dokumentaciju koju je dostavilo pravno lice, utvrđeno je da su obaveze stranke prema "ASA PVA" Sarajevo na dan 31.12.2012. godine iznosile 15.910,99 KM, a ne 10.325,43 KM, koliko je stranka iskazala u obrascu 5 godišnjeg finansijskog izvještaja.
- Takođe, stranka je finansijskom izvještaju i poslovnim knjigama iskazala obavezu prema dobavljaču "Afa Racing" u iznosu od 4.881,91 KM.  
Prema podacima koje je dostavio Afa Racing, utvrđeno je da su obaveze SDA na dan 31.12.2012. godine iznosile 6.868,28 KM, što je za 1.986,37 KM više u odnosu na obaveze koje je SDA iskazala u obrascu 5.
- Revizijom je utvrđeno da je Centrala SDA Sarajevo u obrascu 5 godišnjeg finansijskog izvještaja i poslovnim knjigama iskazala manje obaveze prema pravnom licu "Info biro" Sarajevo za 6.356,20 KM.  
Uvidom u finansijsku dokumentaciju koju je dostavilo pravno lice, utvrđeno je da su obaveze stranke prema "Info biro" Sarajevo na dan 31.12.2012. godine iznosile 30.517,00 KM, a ne 24.160,80 KM, koliko je stranka iskazala u obrascu 5 godišnjeg finansijskog izvještaja.
- Centrala Stranke demokratske akcije Sarajevo je u obrascu 5 finansijskog izvještaja iskazala obavezu prema pravnom licu „Centrotrans“ Sarajevo u iznosu od 21.800,00 KM.  
Prema podacima koje je dostavio „Centrotrans“, stranka na dan 31.12.2012. godine nema obaveza prema ovom pravnom licu.
- Centrala Stranke demokratske akcije Sarajevo je u obrascu 5 finansijskog izvještaja iskazala obaveze prema pravnom licu „Holiday Inn“ Sarajevo u iznosu od 11.149,80 KM.  
Prema podacima koje je dostavio „Holiday Inn“ obaveze stranke prema ovom pravnom licu iznose 1.300,00 KM, što je za 9.849,80 KM manje u odnosu na obaveze koje je SDA iskazala u obrascu 5.
- Uvidom u obrazac 5 utvrđeno je da je Centrala Stranke demokratske akcije Sarajevo iskazala obavezu prema pravnom licu „Foto art“ Sarajevo u iznosu od 18.720,00 KM.  
Prema podacima koje je dostavio „Foto art“ obaveze stranke prema ovom pravnom licu iznose 21.060,00 KM, što je za 2.340,00 KM više u odnosu na obaveze koje je SDA iskazala u obrascu 5.
- Centrala Stranke demokratske akcije Sarajevo je u obrascu 5 finansijskog izvještaja iskazala obavezu prema pravnom licu „Union invest plastika“ Sarajevo u iznosu od 17.491,50 KM.  
Prema podacima koje je dostavio „Union invest plastika“ obaveze stranke prema ovom pravnom licu iznose 39.791,70 KM, što je za 22.300,20 KM više u odnosu na obaveze koje je SDA iskazala u obrascu 5.
- Gradski odbor Stranke demokratske akcije Mostar je u finansijskom izvještaju i poslovnim knjigama iskazao obaveze po osnovu zakupa prema Gradu Mostaru u iznosu od 74.721,28 KM.  
Na osnovu podataka koje je dostavio Grad Mostar, utvrđeno je da su obaveze SDA na dan 31.12.2012. godine iznosile 263,68 KM, što je za 74.457,60 KM manje u odnosu na obaveze koje je SDA iskazala u obrascu 5.

- Općinski odbor Stranke demokratske akcije Zenica je u finansijskom izvještaju i poslovnim knjigama iskazala obaveze prema pravnom licu Džananović Hotel u iznosu od 12.824,80 KM.  
Na osnovu podataka koje je dostavilo pravno lice Džananović Hotel, utvrđeno je da su obaveze SDA na dan 31.12.2012. godine iznosile 8.824,80 KM, što je za 4.000,00 KM manje u odnosu na obaveze koje je SDA iskazala u obrascu 5.
- Kantonalni odbor SDA Unsko-sanskog kantona je u obrascu 5 finansijskog izvještaja iskazao obavezu prema pravnom licu „Aduna“ Bihać u iznosu od 1.348,50 KM.  
Prema podacima koje je dostavila „Aduna“ Bihać stranka na dan 31.12.2012. godine nema obaveza prema ovom pravnom licu.
- U godišnjem finansijskom izvještaju stranka nije iskazala obavezu prema Fondaciji “Fonus” u iznosu od 2.000,00 KM.

### **Troškovi izborne kampanje**

Stranka demokratske akcije je iskazala troškove izborne kampanje u skladu sa odredbama člana 15.10 Izbornog zakona Bosne i Hercegovine, odnosno u okviru zakonom utvrđenog limita.

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM<sup>9</sup> po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Stranka demokratske akcije je na osnovu broja birača mogla potrošiti 1.324.413,45 KM.

U svrhu izborne kampanje Stranke demokratske akcije je iskazala troškove u iznosu od 766.660,83 KM.

### **5.2. PREPORUKE**

***Preporučuje se Stranci demokratske akcije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- ***da se ne finansira iz izvora koji su političkim strankama zabranjeni Zakonom o finansiranju političkih stranaka i***
- ***da vodi evidencije o svojim prihodima i rashodima i da finansijske izvještaje podnosi u formi koju je odobrila Centralna izborna komisija BiH.***

***Takođe, se preporučuje:***

- ***da prihode i rashode priznaje u momentu njihovog nastanka, a ne u trenutku naplate ili plaćanja,***
- ***da uspostavi pomoćne knjige o osnovnim sredstvima i da evidentiranje dobitka ili gubitka po osnovu prodaje osnovnih sredstava vrši u skladu sa računovodstvenim propisima,***
- ***da ovjerava potpisom ovlaštene osobe račune koje isplaćuje putem blagajne, kako bi uspostavila kontrolu nad trošenjem sredstava,***
- ***da redovno vrši popis (inventuru) imovine i obaveza, u skladu sa računovodstvenim propisima,***
- ***da uspostavi pravilne evidencije o svojim potraživanjima***
- ***da uspostavi adekvatne analitičke evidencije za lizing, kako bi imala pregled po svakom urađenom lizingu i***
- ***da izvrši usaglašavanje obaveza i provede odgovarajuća knjiženja u svojim poslovnim knjigama.***

<sup>9</sup> Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

## KOMENTAR

Stranka demokratske akcije je u ostavljenom roku dostavila primjedbe po Preliminarnom izvještaju o reviziji godišnjeg finansijskog izvještaja za 2012. godinu i postizbornog finansijskog izvještaj lokalni izbori 2012., koji joj je dostavljen 21. juna 2014. godine. Uz primjedbe stranka je dostavila relevantne dokaze koje je Služba za reviziju uvažila i u tom dijelu korigovala nalaze revizije.

Zahvaljujemo se ovlaštenoj osobi za finansijske izvještaje i zaposlenima u Centrali Stranke demokratske akcije na dobroj i korektnoj saradnji tokom obavljanja revizije finansijskog izvještaja.

Šef odsjeka za revizijske poslove

Sanja Tošović, revizor

Revizor

Veliborka Kenjić

Pomoćnik revizora

Anela Burdžović-Kapić

Šef Službe za reviziju

mr.sc. Hasida Gušić